

**Naaja H. Nathanielsen
Attaviitsoq**

UPA 2016/37
2. maj 2016

Innarluutillit pisinnaatitaaffii pillugit Nunarsuarmioqatigiit isumaqatigiissutaasa nunatsinnilu innarluutillit pisinnaatitaaffiisa tamakkiisumik illersorneqarsinnaasumillu atuutsinneqarnissaat anguniarlugu Naalakkersuisut kingusinnerpaamik 2017-imi Innarluutillit illersuisuannik pilersitseqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Vivian Motzfeldt, Siumut)

Siunnersuuteqartumut qujanaq innarluutillit pisinnaatitaaffiik ukkataqalersitsinermut. Qularnaatsumik oqaatigineqarsinnaavoq nunatsinni innarluutilinnut atugassaritavut pitsaassutsimikkut naammangimmata. Avatangiisitigut atugarisat ajornartorsiutitaqarput, ilinniarnissamut periarfissat ajornartorsiutitaqarput, neqeroorutigisinnaasat killeqarlutik kiisalu ilinniarsimasunik naammattunik sulisoqanngilagut, innarluutilinnut assigiinngitsunut ilisimasaqartunik - taasariallit ilaat eqqaaginnarlugit. Tamakku saniatigut timikkut tarnikkullu innarluutillit amerlaqisunik isummersorfigineqareertarput. Isummersortarnerillu aallaaveqarput qaammaasaqanngilluinnarnermik. Taamatut pissusilersorsinnaanngilagut! Pisariaqarpoq suut nalinginnaasuunerannik paasinnittaatsitta imaqarnerulernissaa - akuersaartunngornerulertariaqarpugut. Pisariaqarpoq innuttaaqativut innarluutillit inuiaqatigiinnut akuunerulersitsinissarput, ullutsinni pisunit pimoorussinerulluta iliuuseqartariaqarpugut. Neriuppunga innarluutilinnik illersuisussap, innarluutillit ulluni ataatsiakkaaginnarni oqaluuserinniinnartarnermiit ukioq naallugu salliutillugit sullinneqalertarnissaannut isumagissagaa.

Allamik oqaasertalernagu siunnersuutaasoq taperserpara soorlu aamma Naalakkersuisut aappassaaneerinninnissap ukiami ataatsimiinnissamut kinguartinnissaanut qinnuteqaataa taperseriga.